

# AD QVODLIBETARIAM

QVÆSTIO MEDICA.

367

Matutinis concertationibus agitata Die Iouis XVI. Decembr. in Scholis Medicorum  
Parif. M. Iacobo Læto Doctore Medico Præsede.

*An mulieri quam viro Venus aptior?*

**H**UMANVM corpus non tam à calore, quàm à proprijs elementis fluxui est obnoxium: quæ remissis qualitatibus, vt in id conuenere, ita vices incertas contulere: sua cuique *ἰστέα πινυμένων*: ex contrarijs generatio: ad quam, corporum sexusque distinctio, & partium opportunitas, seminis item duorum excretio omnino necessaria est, ita vt Venus tam maris, quàm fœminę genitrix & conseruatric, pro vario vtriusque habitu & temperamento, his aut illis plùs minùsve conducatur, pituitosis multum, biliosis parum.

**V**IR perfectissimum naturæ opus, cælestis caloris copia mulierem vincit, ex semine quippe calidiori (Quod vt & fœmineum, in quo etiam vis mascula, est excrementum vltimi alimenti, animatum, à toto corpore deciduum, sola vi testium prolificum) in dextris & ex dextris partibus, quæ sinistris calidiores sunt: vnde eius in vtero celerior conformatio, motus, partus: Extra, auctio, pubertas, senectus tardior: corpus *πολυαίμο τερον*, venosius, torosius, hirsutius, rarius, sensus exquisitior: voluptas in congressu maior, sed quantò maior, eò periculosior, causa multorum morborum.

**M**ULIER, quasi naturæ *πύρρον*, ex materia serosa, spirantibus præsertim austris, concepta, in frigidiore regione vteri (qui muliebrium omnium morborum est causa) citius fit viripotens, seménque emittit, licet minùs coctum, quo nutritur virile semen, partium solidarum principium: incontinens & iracunda mores habet non venerandos vt mas: corpore glabro, molli, laxo, pingui, pituitoso, & planè morbofo, ni fluant menses (ne dicam semen) qui sæpe in icterum, hydropem, cachexiam desinunt: tantus est natiui caloris defectus, vt mulier (quæ sola molam non concipit) viro comparata omnino frigida humida censeatur.

**B**ILIS in viris ætate florentibus (ad quos Venus, si ad vllos, pertinet) dominatur: quæ, quò intensior, eò humidum radicale minus: senium, mors propinquior: Quam ætatem valde infestant: crebra meri potatio, vnde rigor & desipientia: cibus præter naturam plus ingestus: vigilia, à qua conuulsio, & cruditas: fames, vbi laborandum non est: æstas, qua ventres frigidissimi: timor atque mœsticia, quæ melancholiam accersunt: sed omnium maxime, multa seminis profusio: Qua, Cerebrum mentis domicilium: Cor fons vitæ: Hepar sanguinis officina: & totum corpus temperamento natiuo mutato contabescit: de-  
lirant senes, desipiunt pueri quibus curæ est Venus.

**V**ROR est insignis equarum: mulier *παιδοπύς* appetitu, veluti libidinis cestro percita, quauis ætate, & quouis anni tempore, (æstate tamen potissimum) præter aliarum animantium consuetudinem, marem libenter admittit: nec semel admisisse satis, iuuat vsque morari: virum cunctando lassat, & tandem viribus exhaustum contra obnitendo pessundat, atque debellat: *Quot viros absorbeat vno Maura die?* Ipsa interim nihil damni passa, imò longè vegetior, lætior & sanior ex duello redit: superfluis omnibus humoribus crassis & pituitosis, congregiendi assiduitate, vt & vini generosi, quo salubriùs vititur, facultate, incisis, coctis dissipatis: vir sine magna ipsius pernicië, sic veneri diuturniori par esse vix ac ne vix quidem potest.

*Ergo Mulieri quàm viro Venus aptior.*

Asserebat CAROLVS BVVARDVS Vindocinensis Anno Domini 1604.

DOCTORES DISPVTATVRI,

*Ma. Dionysius Guerin.*

*Ma. Iacobus Lætus Præses.*

*Ma. Ioannes Riolan Profess. Reg.*

*Ma. Andreas le Gros.*

*Ma. Ioannes de Renou.*

*Ma. Petrus Pjart.*

*Ma. Ioannes Beauchesne.*

*Ma. Ioannes Riolan.*

*Ma. Ioannes Hautin.*

